

【鬧熱个落雨天】曾菁怡原作

鬧鐘仔鈴、鈴、鈴¹響哩！大嫗聲喊𠵼遽遽跳床，再過忍床就會赴毋掣去學校讀書哩喲。𠵼目西西仔伸手去掀忒鬧鐘，又過橫落眠床，捨毋得摺佢分開。欸！毋係天光吔？外背仰會還係暗摸骨疏？探頭看往出，原來係天公派烏雲來通知𠵼兜——愛落雨哩！

有人認為落雨天係麻煩天，出外愛著水衣仔，無就擎遮仔，一無細義衫褲又會涿到濕落落仔，愛去哪仔都毋方便。學生仔盡惱無法度出去打球仔、搞寮，一下課就會分先生掌等，麼人都做毋得出去涿雨，故所見看啊著落雨，大家就唉唉唧唧，眼盯盯仔看等雨水號等歸隻个運動坪，實在還慍悴哦！

毋過，落雨天對𠵼來講顛倒係異鬧熱个日仔。朝晨頭一出門，滿街路都係滌滌個車仔，這片嘩嘩、該位叭叭，像久見个朋友相借問樣仔，大家相賽尖共下講起悠久無看著个思念。該兜行路个人，擎等一支支个遮仔花，分雨水淋啊過，踰等就開出各色个花彩，挨去挨轉像在該比看麼人个花較靚樣仔。你係同佢聽較

真兜仔，該雨水打在車仔頂、屋頂、水窟仔還過樹葉仔頂高个聲，全部都無共樣，有高音、有低音，有大聲、有細聲，像係在該唱歌仔分你聽樣仔。成時，雷公還會用曠燭來打燈光，用響雷公來和聲，恁樣講起來，係毋係異生趣？

𠵼盡好在落雨天打早就去學校，因為該兜平常時圓核核个𧈧螺仔²、𧈧公全部都會趨出來搞水。學校個圖牆³係紅毛泥作个，壁項生个溜苔青里里仔，落雨該下，𧈧螺仔趨上趨下陣打陣，相賽看麼儕躉較遽，有个彎來幹起做起畫圖個藝術家，有个停跔在圖牆頂高享受分雨涿個清涼、逍遙、還過自在。

落雨天出來搞寮个𧈧公盡好膽，衫褲無著就緊拚拚仔走出來搞水，溝壘肚朗朗滾个水流緊沖等來佢也毋驚。有幾下尾𧈧公分水沖啊去還會搖來擺去，暢到奈毋得。有个𧈧公大擘擘仔趨到路項來，較砸身个還做得趨轉去；較鑑个將就橫在路徑頭，分天公做主哩！

鬧熱个落雨天，有人懊惱，有人歡喜，天公無法度合每一儕人个意，惱就愛自家改變想法，不管麼个天都係盡好个天。

¹ 鈴：音 liang；擬聲詞。模擬鈴聲。

² 𧈧螺仔：音 seˇ loˇ e`；蝸牛。

³ 圖牆：音 tuˇ xiongˇ；圍牆。